

Inatsisartut suleriaasianni § 37 naapertorlugu matumuuna apeqqutit Naalackersuisunut imaattoq saqqummiuppara:

Apeqqut:

1. **Mittarfeqarfiit silaannakkut angallassinermi atuisunut tamanut, naligiimmik assigiinngisitsinngittumillu sullissiva?**
2. **Ilumoorpa Mittarfeqarfiit ikummatissamik tunisinerminni (illoqarfimmi ataatsimi) atuisunut assigiinngitsunut assigiinngitsunik akeqartitsisut?**
3. **Atuisut tamarmik akiutitaasuni assigiinngitsuni appasinnerpaaq tamarmik akileraluarunikku qanoq angitigisunik ataasiakkaarlutik sipaaruteqassagaluarpaa?**
4. **Ilumoorpa Mittarfeqarfiit malittarisassiat tunngaviginagit akiliisitsisartoq?**
5. **Akiliisitsisarnermut malittarisassiat naapertorlugit §14-mi allassimasoq sullissinissamullu aalajangersakkani § 7 naapertorlugit Mittarfeqarfiit qanoq annertutigisunik isuma-qatigiissusiorsimava?**
6. **Mittarfeqarfiit ukiuni kingullerni tallimani qanoq isertitassaagaluaminnik annaasaqartigippat isumaqatigiissutinik sivisuunik atuuttussanik immikkut ittunik pilersitsisarnermikkut, malittarisassiani akigititat aalajangersimasut naapertorlugit?**
7. **Akigititanik aammalu akiliutinillu pisortatigoortuunngitsunik saqqummiunneqarsimanngitsunik allamoortunik peqarpa?**
8. **”sullissinissamut aalajangersakkat” (version 2.4) malillugit qulaani apeqqummi pineqartumi pisussaaffiliivoq § 2.1.-mi allassimasut najoqqutaralugit sullinneqaqqullugit. Tamanna naligiimmik pineqarnissamut naapertuuppa, atuisut tamakkerlutik § 2.2. atorsinnaanngikkunikku?**
9. **Mittarfeqarfiit isertitassaagaluaminnik ukiuni kingullerni tallimani qanoq annaasaqartigaat sumiiffinni ataasiakkaani ”Sullissinissamik aalajangersakkat” (version 2.4) § 2.2.-mi allassimasut naapertorlugit, atuisut aalajangersimasut immikkut akuerisarnesisigut?**
10. **Ilumoorpa Mittarfeqarfiit tunngaviusunik isumannaallisaanermut isigineqarsinnaasut nunani allani mittarfeqarfinni nalinginnaasunik isumagineqartut sullissinermini pilersuutigisinnaanngikai?**

a. Soorlu assersuutigalugu: De-icing (Sermiaaneq)

(Inatsisartuni ilaasortaq, Vivian Motzfeldt, Siumut)

Tunngavilersuineq:

Ilisimatinneqarsimavunga Mittarfeqarfiit, atuisussaminnik nutaamik aallartikkusuttumit apersorneqarluni ilisimatitsissutigisimagaa, kiffartuussinissat nutaat Kangerlussuarmi ingerlanneqarsinnaammata, mittarfimmi kiffartuussinissat pineqartut, Air Greenlandip piffissami atuiffiata avataatigut pissappata atsaat.

Sullissinermik isumaqatgiissutit tuniniarneqarmata, paasineqarpoq Air Greenland ikummatissamik akikinnerusumik pisisartuq, tassami pisisartunut allanut akigititaasunit akikinnerusumik.

Tassani Mittarfeqarfiit pisinermut malittarineqarsinnaasoq takutitassiarisimavaa, annertunerusumillu akikilliliivigineqassagaannilu 25.000 literit sinnerlugit pisisoqartariaqarluni.

Mittarfeqarfiit ikumatissaq pineqartuq Polar Oil-imiik pisiarisarpaa aki ataasiusoq atorlugu aammalu annertussuseq apeqqutaatinnagu.

”Iliusissamik aalajangersakkat (version 2.4) naapertorlugit ilanngunneqanngitsut §7-imi immikkut ittumik ammaassipput tamaasillunilu ”Mittarfeqarfiit immikkut ittumik pisoqartillugu Iliusissamik aalajangersakkat avaqqullugit aalajangersaasinnaalluni, Mittarfeqarfiit nammineq isummani naapertorlugu pissusissamisoortutut isigissappagu, utaqqisaagallartumik allannguisinnaavoq, tamannalu niuerpalaartumik tunngaveqarluarluni naapertuutissappat atsaat.”

Akigititanut- akiliinissamullu malittarisassiaq (revision 9) immikkut ammaassivoq ”§14, imm. 1 malillugu Mittarfeqarfiit immikkut ittumik akuersissuteqarsinnaavoq, imm. 2 malillugu tunngaviatigut aningaasatigulluunniit annertunerusumik isumaqanngippat, sivikinnerusumik atuuttussamik akileraarutitigut appaasinnaavoq niuerpalaartumik soqutigisat naapertorlugit.”

Immikkut ittumik ammaassinerit marluusut imatut isikkulimmik atorneqarput, sorlulusooq iliusissanut naliginnarnut aammalu pisisartunut naliginnaasunut atorneqarpassillutik, taamaasillunilu aalajangersakkat naapertorlugit kalluaanaveersaartariaqarpoq, tassami imaappoq: atuisut tamarmiusut assigiimmik naligiimmillu pineqaratik.

Paasissutissat saqqummertut aamma ilutigalugit ilaatigut aamma paasinarsivoq s.a. Air Greenland Mittarfeqarfinnut immikkut ittumik isumaqatigiissusiorsimasoq, taamaasillunilu timmissartunik qulimiguulinnillu passussinermi akiusunut immikkut ittumik aalajangersaasimallutik, atuisullu allat naliginnarmik akigititanut akiliinissamullu aalajangersakkat naapertorlugit aammalu ”Iliusissamik aalajangersakkat” naapertorlugit pineqaannarlutik, naligiimmik pineqaratik.

”Iliusissamik aalajangersakkat” periarfissiippat aalajangersaanissami suliaqartussa qulimiguulinnillu akiusussap Mittarfeqarfimmiik akuerineqassasoq. Tamannarpiaq atuisunut equngasumik pineqarnissamik periarfissiimmat, pisariaqarpoq paasissallugu ilumut taamatut pisoqarsimanersoq, aammalu tamanut nalunaarutigineqarsimanersoq atuisunut allanut, tassami tamarmik assigiimmik atuisinnaasariaqarmata.

Tamanit ilisimaneqareerpoq Mittarfeqarfiit sullissisuummata mittarfinnut heliportinullu imatut inissimasunut, niuerpalaartumik akilersinnaanani atuisumut namminerisamik timmisartunut iniliaqassalluni allatigulluunniit atortoqassappat.

Tassunga tunngatillugu aamma ilisimaneqarluarpoq, Air Greenland mittarfinni aalajangersimasuni imminut sullissisinissani toqqartarmassuk, s.a. heliportini qulimiguulinnullu allatigut mittarfiusunut, taamaaliornermini akiliinissamik pinngitsaalineqarsinnaanani (naak ingerlatseqatigiiffiit allat pinngitsaalisaasut). Tamanna pissutigalugu inuiaqatigiinnut pingaartupilussuuvoq paasissallugu Mittarfeqarfiit isertitassatut annaasani qanoq annertutiginersut.

Mittarfeqarfiit pinngitsaalisaapput atuisut kikkulluunniit sullissallugit taamaallaallu Mittarfeqarfiit Air Greenlandimit atorneqartut minillugit, tassanimi Air Greenlandi §2.2 atormagu, taamaasillunilu Mittarfeqarfiit ingerlatsivissuurtut angisuutut isertitassaagaluanani annaasaqatigalugit aammalu atuisut assigiimmik kalluaannaveersaartumillu pisussaagalarlugit.

”Iliusissamik aalajangersakkani” allassimavoq Mittarfeqarfiit sermiiaanermut atortui taamaallaat Air Greenlandimut atorneqaqqusaasut. Taamaasillunilu atuisut allat Air Greenlandimiik ajunngisaarfigineqaqqaartariaqaannarani, aamma minnerunngitsumik Air Greenlandip aningaasatigut annertuumik isertitaqarsinnaanngorpoq nammineq atortuni atukkiuttarnerisigut. Nunani allani atortutigut piunasaqaataasut sillimaniarnikkut tunngaviummik annertuumik piunasaqarfigineqarput, timmisartummi sermiarneqarnissaat sillimmasersuinikkut annertooujussuarmik ajunaarnissamik sunniuteqarataarsinmmat.

Mittarfeqarfiit nutaat aammalumi suli maannamiik takinerusut sananeqaleruttorfiini pisariaqarluinnarpoq paasissutissat ersarissut saqqummersissallugit, siunissami Nunatsinni peqqissumik ineriartorfiulluurtumillu mittarfeqarnikkut suliaqarfeqarnissarput pisariaqarluinnarmat.

Apeqqutigisakka ullut suliffiusut qulit ingerlanerani akineqarnissaat kissaatigaara.